

Қазақстан Республикасының Үкіметі мен Қырғыз Республикасының Министрлер Кабинеті арасындағы Қырғыз Республикасы Ұлттық қауіпсіздік мемлекеттік комитетінің Шекара қызметі үшін кадрлар даярлау саласындағы келісімге қол қою туралы

Қазақстан Республикасы Үкіметінің 2025 жылғы 5 тамыздағы № 597 қаулысы

Қазақстан Республикасының Үкіметі **ҚАУЛЫ ЕТЕДІ:**

1. Қоса беріліп отырған Қазақстан Республикасының Үкіметі мен Қырғыз Республикасының Министрлер Кабинеті арасындағы Қырғыз Республикасы Ұлттық қауіпсіздік мемлекеттік комитетінің Шекара қызметі үшін кадрлар даярлау саласындағы келісімнің жобасы мақұлданын.

2. Қазақстан Республикасы Ұлттық қауіпсіздік комитетінің Төрағасы Ермек Алдабергенұлы Сағымбаевқа Қазақстан Республикасының Үкіметі мен Қырғыз Республикасының Министрлер Кабинеті арасындағы Қырғыз Республикасы Ұлттық қауіпсіздік мемлекеттік комитетінің Шекара қызметі үшін кадрлар даярлау саласындағы келісімге қағидаттық сипаты жоқ өзгерістер мен толықтырулар енгізуге рұқсат бере отырып, Қазақстан Республикасы Үкіметінің атынан қол қоюға өкілеттік берілсін.

3. Осы қаулы қол қойылған күнінен бастап қолданысқа енгізіледі.

*Қазақстан Республикасының
Премьер-Министрі*

О. Бектенов

Қазақстан Республикасы
Үкіметінің
2025 жылғы 28 мамырдағы
№ 382 қаулысымен
мақұлданған
Жоба

Қазақстан Республикасының Үкіметі мен Қырғыз Республикасының Министрлер Кабинеті арасындағы Қырғыз Республикасы Ұлттық қауіпсіздік мемлекеттік комитетінің Шекара қызметі үшін кадрлар даярлау саласындағы келісім

Бұдан әрі Тараптар деп аталатын Қазақстан Республикасының Үкіметі мен Қырғыз Республикасының Министрлер Кабинеті достық қатынастарды дамыту және нығайту ниетін негізге ала отырып, сыртқы шекара қауіпсіздігін қамтамасыз ету саласындағы интеграциялық процестерді жолға қоюға және тереңдетуге ұмтыла отырып, Тәуелсіз Мемлекеттер Достастығына қатысушы мемлекеттердің сыртқы шекараларын сенімді күзету үшін шекара әскерлерінің кәсіптік даярланған әскери кадрларының шешуші маңызын ұғына отырып,

1995 жылғы 3 қарашадағы Тәуелсіз Мемлекеттер Достастығына қатысушы мемлекеттердің шекара әскерлеріне арналған әскери кадрларды даярлау мен олардың біліктілігін арттырудағы ынтымақтастық туралы келісімнің 1-бабын басшылыққа ала отырып, төмендегілер туралы келісті:

1-бап

Қазақстан Тарапы Қырғыз Республикасы Ұлттық қауіпсіздік мемлекеттік комитеті Шекара қызметінің әскери қызметшілерінің Қазақстан Республикасы Ұлттық қауіпсіздік комитетінің Төрағасы бекіткен штат саны лимиті мен ҰҚК Шекара академиясын ұстауға бөлінген қаражат шегінде уағдаласқан санын Тараптар жыл сайын келісетін мамандықтар бойынша және мерзімге Қазақстан Республикасы, Алматы қаласы, Достық даңғылы, 103-үй мекенжайында орналасқан Қазақстан Республикасы Ұлттық қауіпсіздік комитетінің Шекара академиясына (бұдан әрі – ҰҚК Шекара академиясы) оқуға қабылдайды. Келісу нәтижелері келісімшарттармен ресімделеді.

2-бап

Тараптардың осы Келісімнің орындалуы үшін жауапты уәкілетті органдары:

Қазақстан Тарапынан – Қазақстан Республикасының Ұлттық қауіпсіздік комитеті;

Қырғыз Тарапынан – Қырғыз Республикасы Ұлттық қауіпсіздік мемлекеттік комитетінің Шекара қызметі болып табылады.

Жоғарыда аталған өкілетті органдардың атаулары немесе функциялары өзгерген жағдайда Тараптар дипломатиялық арналар арқылы уақытылы хабардар етілетін болады.

3-бап

Әскери қызметшілерді оқуға қабылдау Қырғыз Тарапының жыл сайынғы жазбаша өтінімдеріне, Қазақстан Тарапының ұсынымдары мен мүмкіндіктеріне сәйкес жүргізіледі. Өтінімдер оқу басталғанға дейін кемінде алты ай бұрын жіберіледі. Өтінімдерде оқыту мамандығы және әр мамандық бойынша жеке-жеке үміткерлер саны, оқуға үміткерлердің жалпы білім деңгейі көрсетіледі.

Қырғыз Тарапы ҰҚК Шекара академиясында оқуға үміткерлерді іріктеуді Қазақстан Тарапы жыл сайын белгілейтін квотаға сәйкес жүзеге асырады.

Жоғары білімнің білім беру бағдарламалары бойынша Қазақстан Республикасы ұлттық қауіпсіздік органдарының әскери, арнаулы оқу орындарына (бұдан әрі – ҰҚО ӨАОО) Қырғыз Республикасының мынадай азаматтары қабылданады:

1) жалпы орта, кәсіптік бастауыш немесе кәсіптік орта білімі бар, әскери қызмет өткермеген, оқуға түсетін жылы он жеті жасқа толған, бірақ жиырма бір жастан аспаған ;

2) арнаулы мемлекеттік органдарда әскери қызмет не қызмет өткерген және оқуға түсетін жылы жиырма төрт жасқа толмаған, мерзімді әскери қызмет өткеріп жүрген әскери қызметшілер;

3) келісімшарт бойынша әскери қызмет өткеріп жүрген әскери қызметшілер не оқуға түсетін жылы жиырма бес жасқа толмаған, арнаулы мемлекеттік органдарда қызмет өткеріп жүрген қызметкерлер.

Жоғары білім және оқу мерзімі қысқартылған жоғары білімнің білім беру бағдарламалары бойынша оқуға үміткердің жасы ол ҰҚО ӘАОО-ға оқуға қабылданатын күнге айқындалады.

4-бап

Қырғыз Тарапы әскери қызметшілерді кәсіптік іріктеуді, медициналық куәландыруды, қабылдау емтихандарын өткізуді Қырғыз Тарапы белгілеген бағдарлама бойынша конкурстық негізде белгіленген тәртіппен жүзеге асырады және ҰҚК Шекара академиясына оқуға алдын ала белгіленген мерзімде жібереді.

Оқу Қазақстан Республикасы ҰҚО ӘАОО-да қабылданған қолданыстағы жұмыс оқу жоспарлары мен жұмыс оқу бағдарламаларына сәйкес орыс тілінде жүргізіледі.

Үміткер орыс тілін базалық деңгейде меңгерген болуға тиіс. Орыс тілін меңгеруінің ауызша және жазбаша сөйлеу дағдыларын тексеру Қазақстан Тарапы өкілдерінің міндетті қатысуымен жүзеге асырылады.

5-бап

Қырғыз Тарапы оқу басталғанға дейін бір ай бұрын Қазақстан Тарапының атына мыналарды жібереді:

– әскери қызметшілердің әскери атағы, тегі, аты, әкесінің аты, туған жылы, жалпы білімі, көздейтін мамандығы көрсетілген тізімінің екі данасы;

– оқуға үміткерлердің оқу істері, олар мыналарды:

кәсіптік іріктеудің нәтижелерін, мемлекеттік құпияларға жатқызылған мәліметтерді алу (беру) құқықтарының бар-жоғы туралы қорытындыны және толық орта білімі туралы құжаттарының нотариалды куәландырылған көшірмелерін қамтиды.

ҰҚК Шекара академиясынан оқудан шығарылған немесе оны бітіріп шыққан Қырғыз Тарапы әскери қызметшілерінің оқу істері Қырғыз Тарапына жіберіледі.

Қырғыз Тарапының әскери қызметшілері оқуға белгіленген тәртіппен оқу жылының басталуына қарай келеді, оларда өзімен бірге:

– Қазақстан Республикасының Мемлекеттік шекарасынан өтуге құқық беретін жеке басын куәландыратын жарамды құжаты;

– білімі туралы, оқыған пәндері мен олар бойынша алған бағалары туралы құжаттардың түпнұсқалары мен көшірмелері;

– жоғары оқу орындарына түсу емтихандарын тапсыру ведомосынан үзінді;

– медициналық куәландыру қорытындысы және берілгеніне 3 (үш) айдан аспаған, тік проекцияда түсірілген көкірек қуысы ағзаларын флюорографиялық зерттеу, сондай-ақ АҚТҚ-инфекциясы мен гепатитке (В, С) тексеру туралы берілгеніне бір айдан аспаған медициналық қорытынды;

– әскери нысандағы киімде түскен өлшемі 4,5 x 3,5 см бес фотосурет;

– Қырғыз Республикасының мемлекеттік құпияларына рұқсатының тиісті нысаны болуы керек.

Оқуға үміткерлердің құжаттары орыс тілінде ресімдеуге және нотариалды куәландыруға тиіс.

Қырғыз Тарапы үміткерлердің белгіленген мерзімде оқуға келуін қамтамасыз етеді.

Қырғыз Тарапы әскери қызметшілерінің оқудың басталуына қарай келуі мүмкін болмаған жағдайда Қырғыз Тарапы бұл туралы оқу басталғанға дейін кемінде он күн бұрын Қазақстан Тарапына хабарлауға міндетті.

Қырғыз Тарапы оқуға жіберген кезде Қырғыз Тарапының әскери қызметшілері қатарынан ұлттық топтың жетекшісін тағайындайды, ол сол Тараптың ҰҚК Шекара академиясындағы өкілі болып табылады.

6-бап

ҰҚК Шекара академиясында оқитын Қырғыз Тарапының әскери қызметшілеріне оқу жоспарларына сәйкес жыл сайын мынадай каникулдық демалыс беріледі:

1) жазғы демалыс – отыз тәулік;

2) қысқы демалыс – он төрт тәулік.

Каникулдық демалыс өткізілетін жерге және кері қарай жол жүру үшін қажетті уақыт берілмейді.

7-бап

Қазақстан Тарапы Қырғыз Тарапының әскери қызметшілерін ҰҚК Шекара академиясында оқыту барысында:

– Қазақстан Республикасының ішкі істер органдарында уақытша тіркеумен;

– стипендиямен;

– заттай мүлікпен;

– тұратын үй-жайлармен (жатақханалармен);

– үш мезгіл тамақпен;

– оқу құралдарымен, оқу-сыныптық керек-жарақтармен, зертханалық жабдықпен, қару-жарақпен, техникамен, оқ-дәрімен, практикалық оқытудың техникалық құралдарымен;

– арнайы оқу жоспарлары мен бағдарламаларына сәйкес оқу процесіне қажетті шығыс материалдарымен және басқа да жабдықпен;

– оқу процесіне қажетті кітапханаларды, оқу және спорт залдарын және басқа үй-жайларды пайдалану құқығымен;

– госпитальға жатқызу мен дәрі-дәрмек беруді қоса алғанда, медициналық қызмет көрсетумен;

– оқу мақсаттары үшін көлікпен;

– киім-кешекпен, сондай-ақ Қазақстан Тарапы әскери қызметшілерінің қазіргі санаттарына арналған нормалар бойынша техникамен жұмыс істеуге арналған арнайы киіммен қамтамасыз етеді.

Арнайы киім уақытша пайдалануға беріледі және оқу аяқталғаннан кейін ол алған орнына қайтарылуға тиіс.

8-бап

Қырғыз Тарапының әскери қызметшілерін стипендиямен, киім-кешекпен, тамақпен және тұрғын үй-жайлармен (жатақханамен) қамтамасыз етуді, сондай-ақ оқуға байланысты шығыстарды Қазақстан Тарапы әскери қызметшілерінің тиісті санаттары үшін белгіленген нормалар бойынша Қазақстан Тарапы жүзеге асырады.

Қырғыз Тарапы Қырғыз Тарапының заңнамасына сәйкес Қырғыз Тарапының әскери қызметшілеріне:

– әскери қызметшілердің жол жүру, әскери қызмет өткеретін жерінен (тұрғылықты жерінен) оқу орнына дейін олардың багажын тасымалдау;

– оқу орнынан әскери қызмет өткеретін жеріне (тұрғылықты жеріне) дейін олардың багажын тасымалдау, каникул және жеке мән-жайлар бойынша демалысқа, кәсіптік практика мен тағылымдамадан өтуге және кері қарай, ҰҚК Шекара академиясынан оқудан шығарылған және оқу бітірген соң қызмет орнына кеткен жағдайда Қырғыз Республикасының аумағына оралғанда жол жүру ақысын төлеуді жүзеге асырады.

9-бап

Қырғыз Тарапының әскери қызметшісінің кінәсінен Қазақстан Тарапының мүлкіне зақым келген жағдайда Қырғыз Тарапының әскери қызметшісі оны жөндеу немесе ауыстыру құнын Қазақстан Республикасының қолданыстағы заңнамасына сәйкес нақты шығындарды негізге ала отырып өтейді.

Қырғыз Тарапының әскери қызметшісінің кінәсінен Қазақстан Тарапының мүлкі жоғалған жағдайда Қырғыз Тарапының әскери қызметшісі оның құнын Қазақстан Тарапы әскери қызметшілерінің тиісті санаттары үшін анықталған мөлшерде өтейді.

10-бап

ҰҚК Шекара академиясында оқып жүрген Қырғыз Тарапының әскери қызметшілеріне Қазақстан Республикасының заңнамасында шетелдік азаматтар үшін көзделген құқықтар мен міндеттер қолданылады.

Қырғыз Тарапының әскери қызметшілері Қазақстан Республикасы заңнамасының талаптарын, Қазақстан Республикасы Қарулы Күштерінің, басқа да әскерлері мен әскери құрылымдарының әскери қызмет өткеруді, сондай-ақ ҰҚК Шекара академиясындағы ішкі тәртіпті және оқу процесін регламенттейтін жалпыәскери жарғыларын сақтауға міндетті.

ҰҚК Шекара академиясында оқитын және жоғарыда көрсетілген талаптарды бұзған , сондай-ақ Қырғыз Тарапының шешімі бойынша кері шақырылып алынған әскери қызметшілер ҰҚК Шекара академиясынан шығарылады және Қырғыз Республикасына жіберіледі.

11-бап

Әскери қызметші сырқаттанып, бұл одан әрі оқуына кедергі келтіретін болса, ол әскери-дәрігерлік комиссияға жіберіледі. Әскери-дәрігерлік комиссия сырқаттанған әскери қызметші одан әрі оқуға жарамсыз деп шешім қабылдаған жағдайда ол ҰҚК Шекара академиясынан оқудан шығарылады және Қырғыз Тарапының қарамағына жіберіледі.

Қырғыз Республикасының әскери қызметшісі Қазақстан Республикасының аумағында қайтыс болған (қаза тапқан) жағдайда қайтыс болған (қаза тапқан) адамның мәйітін Қырғыз Республикасына жіберуді Қырғыз Тарапы өз есебінен қамтамасыз етеді . Қазақстан Тарапы Қырғыз Тарапының өтініші бойынша қажетті жәрдем көрсетеді.

Қазақстан Тарапы барлық жағдайларда Қырғыз Тарапын оқып жүрген адамның қайтыс болғаны туралы дереу хабардар етеді, ал қайтыс болу себептерін Қазақстан Республикасының заңнамасына сәйкес уәкілеттік берілген Қазақстан Тарапының құзыретті органдары анықтайтын болады.

12-бап

Қырғыз Тарапының әскери қызметшілерінің кәсіптік практикасы мен тағылымдамасы Қазақстан Тарапының арнаулы әскери оқу орындарының жұмыс оқу

жоспарлары мен жұмыс оқу бағдарламаларына сәйкес Қырғыз Тарапының практика мен тағылымдама базасында жүргізіледі және каникулдық демалысқа (жазғы, қысқы) шығумен біріктіріледі (әдетте).

Қазақстан Республикасының заңнамасына сәйкес қорытынды аттестаттаудан өткен және тиісті білім беру бағдарламасын игергенін растаған білім алушыларға Мемлекеттік аттестаттау комиссиясының шешімімен "бакалавр" дәрежесі беріледі, диплом және белгіленген үлгідегі төсбелгілер тапсырылады.

ҰҚК Шекара академиясында оқып жүрген Қырғыз Тарапының әскери қызметшілеріне алғашқы офицер атағын беру ҰҚК Шекара академиясы жіберген ақпараттың негізінде Қырғыз Республикасының заңнамасына сәйкес жүзеге асырылады.

13-бап

Оқу бітірген Қырғыз Тарапының әскери қызметшілерінің жұмыс дәптерлері Қырғыз Тарапының сұрау салуы негізінде белгіленген тәртіппен Қырғыз Республикасына жіберілуі мүмкін.

14-бап

Осы Келісімді іске асыру шеңберінде алынған құпия және өте құпия ақпараттың рұқсатсыз тарап кетуіне немесе жария болуына жол берген не өзге қылмыстық құқық бұзушылық жасаған Қырғыз Тарапының ҰҚК Шекара академиясында оқып жатқан әскери қызметшілері ол жасалған жердегі Тараптар мемлекеттерінің ұлттық заңнамасында көзделген тәртіппен жауапты болады.

15-бап

Тараптардың өзара келісуі бойынша осы Келісімге осы Келісімнің ажырамас бөліктері болып табылатын жеке хаттамалар түрінде ресімделетін өзгерістер мен толықтырулар енгізілуі мүмкін. Осы Келісімді іске асыру кезінде туындайтын барлық дауларды Тараптар өзара консультациялар және келіссөздер жолымен шешеді.

16-бап

Осы Келісім оның күшіне енуі үшін қажетті мемлекетішілік рәсімдердің орындалғаны туралы Тараптардың жазбаша хабарламаларының соңғысы дипломатиялық арналар арқылы алынған күннен бастап күшіне енеді.

Осы Келісім белгіленбеген мерзімге жасалады және Тараптардың бірі екінші Тараптың оның қолдануын тоқтату ниеті туралы тиісті жазбаша хабарламасын дипломатиялық арналар арқылы алған күннен кейін алты ай өткенге дейін күшінде қалады.

Осы Келісімнің қолданылуы тоқтатылған жағдайда оның негізінде жасалған келісімшарттар Тараптардың олар бойынша міндеттемелері орындалғанға дейін қолданыста болады.

Осы Келісім күшіне енген күнінен бастап 2006 жылғы 4 шілдедегі Қазақстан Республикасының Үкіметі мен Қырғыз Республикасының Үкіметі арасындағы Қырғыз Республикасының Шекара қызметі үшін кадрлар даярлау саласындағы келісім өз қолданысын тоқтатады.

20__ жылғы " __ " _____ қаласында қазақ, қырғыз және орыс тілдерінде екі данада жасалды барлық мәтіндердің күші бірдей.

Осы Келісімнің ережелерін түсіндіру кезінде келіспеушіліктер туындаған жағдайда Тараптар орыс тіліндегі мәтінге жүгінетін болады.

*Қазақстан Республикасының
Үкіметі үшін*

*Қырғыз Республикасының
Министрлер Кабинеті үшін*